



大清聖祖合天弘運文武睿哲恭儉寬裕孝敬
誠信中和功德大成仁皇帝聖訓卷之二十一

恤民一

康熙六年丁未五月丙午

上諭吏部等衙門民爲邦本必使家給人足安
生樂業方可稱太平之治近聞直隸各省民
多失所疾苦顛連深可憫念或係官吏貪酷
朘削窮黎抑或法制未便致民失業果何道
以遂其生耶一切民生利病應行應革爾內

外各衙門大小文武等官念切民依其抒所
見毋隱

康熙七年戊申六月辛巳戶部覆報災
定例夏災不出六月秋災不出九月但
踏勘於收穫未畢之先始可分別輕重
請嗣後報災限期夏災不過五月初一
秋災不過八月初一踰期仍如例治罪
上曰凡被災州縣有司必先勘察申報該撫然
後具題地方遠近不一若限期太迫被災之

民恐致苦累其仍如舊例行

七月乙卯直隸巡撫甘文焜請復巡歷
舊規部議不准

上曰前諭各省遇有水旱等災督撫務減儀從
將被災地方作速親勘欲令體訪貪虐官吏
重加懲治且使兵民疾苦地方應行之事得
以驗實更改督撫若不巡歷屬員反借災荒
顛倒重輕私行科派俱未可定甘文焜所請
著准行

康熙八年己酉三月辛丑

上諭戶部前以爾部題請直隸等省廢藩田產
差部員會同各該督撫將荒熟田地酌量變
價今思既以地易價復徵額賦重爲民累著
免其變價撤回所差部員將見在未變價田
地交與該督撫給與原種之人令其耕種照
常徵糧以副朕愛養民生之意

康熙九年庚戌正月己酉初直隸各省
廢藩田產奉

旨免其易價改入民戶名爲更名地內有廢藩
自置之地給民佃種者輸糧之外又納
租銀重徵爲累而戶部議以久載全書
不當蠲免

上曰更名地內自置田土百姓旣納正賦又徵
租銀實爲重累著與民田一例輸糧免其納
租至易價銀兩有徵收在庫者許抵次年正
賦

康熙十二年癸丑三月辛巳

上諭禮部民資粒食以生今當播種之時亢暘
不雨農事堪憂皆由朕躬涼德政治有所未
協未能仰格

天心用是夙夜靡寧實圖修省以感召休和爲
民請命爾部卽虔誠祈禱雨澤以副朕勤恤
民隱至意

四月癸卯

上諭巡視五城御史曰每遇民間失火朕常遣
侍衛往救聞爾巡城官員於失火時卽執伊

家主查訊恐其家一切財物無人照看必至
匪類乘機竊盜深屬無辜此後俟火息時再
行查議

十一月庚午

上諭戶部自古國家久安長治之模莫不以足
民爲首務必使田野開闢蓋藏有餘而又取
之不盡其力然後民氣和樂聿成豐亨豫大
之休見行墾荒定例六年起科朕思小民拮
据開荒物力艱難恐催科期迫反致失業朕

心深爲軫念嗣後各省開墾荒地俱再加寬
限通計十年方行起科其所司官員原有議
敘定例如新任官自圖錄敘掩襲前功紛更
擾民者各督撫嚴行稽察題叅治罪

康熙十三年甲寅正月癸未

上諭兵部近因吳三桂背恩叛逆已遣大兵前
往征剿聞楚省百姓有先行驚避者輕離家
室恐致失所朕心深爲憫念向來大兵紀律
嚴明所過竝無騷擾今寧南靖寇大將軍啓

行朕面加誡諭務令秋毫無犯安輯地方逆
寇煽惑不過一隅大兵到日立見蕩平該地
方軍民人等俱係朕之赤子遣發大兵原以
衛民不必驚懼著地方官廣行宣諭俾各安
生理勿致流離以副朕定亂安民之意

戊子

上諭兵部刑部近因逆犯楊起隆詐稱朱三煽
惑愚民潛謀不軌逆黨相繼緝獲業經審明
正法牽連人犯槩行省釋除逆首楊起隆等

仍行嚴緝外其餘黨羽亦從寬免緝俾得改
行從善恪遵法紀勿致自干憲典軍民人等
俱宜各安生業不得聽信訛言自生疑懼旁
人亦不許妄行首告借端嚇詐擾害善良爾
部卽出示通行曉諭

二月辛酉

上諭戶部兵部逆賊吳三桂心若虺蛇行同梟
獍負恩謀叛倡亂害民當明季闖寇入京吳
三桂勢窮來歸我

世祖章皇帝念其投順優待有加寵以王爵托以腹心嗣大兵克復黔滇巖疆初定令其移駐防禦畀以事權及朕卽位以來推誠尤至兩省官職聽其選擇題授給養家口兵丁歲費不貲且欲其感恩知報特加親王人臣之分已極委任之專無比乃去年伊自具疏求歸故土朕憫其久在邊遠勞於戎事年已衰殘欲令其父子祖孫得以完聚准與遷移遂其所請復爲之區畫房地資給行糧眷念體

恤委曲周至詎意包藏禍心久蓄不軌陽報起程日期遽乃擁衆倡叛蹂躪百姓竊踞城池散布僞劄妄張聲勢以致鄰近州縣無知之徒被其煽惑又復假造訛言潛行傳布以冀搖動愚民種種狡謀悖天蔑理卽屢次發兵朕皆嚴諭將帥令體朕軫念斯民至意務期秋毫無犯無非欲救濟百姓安輯地方今寧南靖寇大將軍王等率領大兵各路進剿不日殲滅以行天誅吳三桂反覆亂常不忠

不孝不義不仁爲一時之叛首實萬世之罪
魁行卽懸首藁街以洩神人之憤猶恐小民
輒相驚疑不察虛實妄行聽信立意一差如
蹈陷阱邪正之介卽禍福之關身家性命所
繫不小朕心不忍赤子悞罹法網有傷天和
爾部卽行文直隸各省督撫刊刻告示通行
所屬各州縣徧諭百姓俾各安生業勿聽訛
傳以副朕保全元元之意

四月丙申戶部議河南彰德府因大兵

經行秣馬需用芻豆業令採辦運送甫至中途而大兵已過應發還民間

上曰芻豆已經運送復還民間恐致苦累其見在未給草豆准令存貯以備續發軍需

十一月辛未

上諭兵部凡陷賊地方皆我赤子今者詰爾戎兵四征不庭原以除暴安民念愚氓被脅截髮特一時貪生畏死之恒情若大兵所至槩行誅戮非朕救民水火之意百姓無由自新

狡賊反得藉以煽誘嗣後大兵進剿有鄉民持械拒敵及竊踞城池山寨不卽迎降者仍行誅戮其餘槩從寬免至剿殺賊徒自應俘其子女但賊營婦女多係擄掠脅從破賊之後凡所擄難民子女許民間認領不得一槩妄收爾部其傳諭滿漢官兵咸體朕意毋忽

十二月壬寅

上諭禮部古帝王撫御天下莫不以禮制爲先務然釐定章程必文質適中方可昭垂永久

前見風俗近奢恐漸流於僭濫故令更定條例一切服飾力從儉樸冀返淳龐詎意有司奉行過當專事苛細借端紛擾以致商賈壅滯物力匱絀小民深爲未便以後著仍照康熙九年定例遵行見今一應禁約俱行停止爾部卽遵諭行

癸丑陝西總督哈占奏陝西百姓供應芻糧疲於奔命請令山西就近輸運

上諭曰山西運糧水路則有黃河汾渭之險陸

路輸輓則道遠費重民不能堪著戶部發銀十五萬兩擇能員解至西安採辦供應聞秦民亦值困苦之際軍需芻糧若令價值稍增民爭什一之利自樂於輸送不悞軍需倘有不肖官員苛派侵剋使民不得均沾實惠者督撫指名劾奏從重治罪

康熙十五年丙辰二月丁巳

上諭兵部湖南百姓遭亂以來困苦萬狀賊糧匱勢窮恣行劫掠百姓罹其荼毒如在湯火

今大兵剋期進發正解民倒懸之日其令大將軍等遣賢能官同地方官宣布撫民敕諭凡恢復城池後勿妄殺掠以輯人心以綏地方

康熙十六年丁巳二月辛酉

上諭戶部閩地經海孽擾亂又遭逆賊暴征橫斂民困已極今年錢糧盡予蠲免其遭亂竄避人民俱招徠還籍俾各安本業

康熙十八年己未四月甲戌

上諭禮部民資粒食以生今時值夏令雨澤未
降久旱傷麥秋種未下農事堪憂皆由朕躬
涼德政治未協大小臣工不能潔已愛民勤
修職業致干

天和朕用是夙夜靡寧深切警惕實圖修省諸
臣亦用循省過愆恪共乃職期於共襄治理
感召休和茲當虔誠齋戒躬詣

天壇親行祈禱爲民請命爾部卽擇期具儀以
聞

十二月癸未戶部議撥盛京成熟地畝
分給新滿洲

上曰田畝百姓生業所關以熟地撥給新滿洲
恐生民困苦可更議兩便之法

康熙十九年庚申二月丁卯

上諭戶部前因各省饑饉已遣官賑濟今京師
附近地方流民甚多朕心深爲憫惻若不亟
行安插令其得所難以生全作何設法俾各
歸原籍著該地方官加意撫綏安集復業以

免流離九卿詹事科道詳議具奏

十月庚子

上諭大學士等曰各旗差遣家人或往外省索
債或令隨官赴任或以私情干求外官者甚
多小民最爲苦累若詳加察究則各旗不遣
家僕出外者能有幾人此等累民之事爾等
可令吏兵刑三部及都察院會同定例嚴禁
康熙二十年辛酉二月癸巳

上諭戶部直隸各省清察隱占田畝州縣有司

或利其陞敘虛報田糧攤派民間致滋苦累
亦未可定爾部可檄行直隸各省督撫著嚴
行察覈以除其弊

四月戊子

上駐蹕三屯營西南

命學士禧佛往諭遵化州知州鄭喬生曰鮎魚
池周圍地畝不許蹂踐雖屢經嚴諭未必無
礙田禾著知州親行細察所傷地畝若干應
納錢糧若干俟回鑾日轉奏

十一月辛酉

上諭大學士等曰朕頃駐固安任邱聞戶部官員將各州縣均派草豆甚爲擾民工部向民間私借柴炭亦多擾民俱宜嚴禁又聞部院各官借稱預備差遣無故傳集窮民跟隨苦累俱宜嚴禁每次巡幸騷擾百姓者多係部院各官可傳諭嚴飭以後毋得再蹈前轍

康熙二十一年壬戌正月辛未

上諭戶部漕糧定例官收官兌獨浙省民兌另

立私截之名困苦百姓著檄巡撫嚴禁違者
卽行叅劾

八月辛巳先是潼關額稅七千餘兩有
司徵收康熙十九年始遣郎中敦多禮
督徵得稅四萬餘兩至是例請部員更
替

上諭曰數年以來秦省兵民苦於輓運潼關收
稅仍照舊額著停止差遣部員

甲辰

上諭戶部朕聞先由水路出征大兵因晝夜趲行以致緯夫死者甚多深軫朕懷今爾部差去催趲糧船官員恐欲糧船速抵水次致緯夫苦累著行文申飭曉諭

九月壬戌

上諭大學士等曰自用兵以來百姓供應煩苦朕前屢言俟天下蕩平將錢糧寬免爾等可同戶部先將天下錢糧出納之數通算啓奏至陝西一省供應較他省苦累更甚錢糧尤

宜寬免

十二月壬午兵部議准雲南貴州總督
蔡毓榮請禁土司民人攜藏兵器及漢
人將鉛硝硫黃售與外彝

上曰聞衆土司人等賴弩弓長鎗捕獵爲業今
若槩行禁止則失其生計矣治民惟在所司
官撫綏安戢倘不愛民肆其殘虐民操白梃
亦可爲非爾等其詳議以聞

康熙二十二年癸亥七月辛卯

上駐蹕陳穀莊

諭八旗護軍統領等曰穀者民生之命一歲不登則一歲乏食今正秋收之時田穀未穫向恐擅放馬匹蹂踐禾苗屢降明諭傳飭今觀隨從人等尚有不遵法令蹂踐民田者爾等各嚴緝以聞

九月戊子

上奉

太皇太后幸五臺途次遇村民負米豆等物詢

之云備臨幸之用隨傳

諭大學士等曰

太皇太后駕臨五臺一切應用之物皆出內帑
預備原無絲毫取給小民此所備物件何處
應用可察明具奏隨詢五臺知縣趙繼晉及
村民等皆云五臺地方偏僻恐物用不
敷故給價小民令預備以待用原非出
於科派

上曰一切物用內廷既備此後不必再行齎送

可傳諭直隸山西沿途官民知之

康熙二十三年甲子四月丙辰工部題

請

敕諭直隸河南巡撫嚴飭所屬官員閉塞衛河水口勿使旁洩以濟漕運俟漕船過完照常聽其分流

上曰漕運所關雖係甚重但直隸河南之民多資衛河水利若水口盡行閉塞不使稍溉田禾一遇旱乾瀕河之民必致艱苦又部議俟

漕船過後方聽照常通流耕種自有定時如
漕船過完方許漑田則於田禾無濟該部但
期不悞漕運初未嘗慮及民生也此事著另
行確議奏聞

五月壬午戶部奏丈量旗下圈地凡有
溢額者請另行撥給

上諭大學士等曰田地爲民恒產已經給與者
不便復行取回其旗下大臣官員既有溢額
之地理宜註冊俟需用時再行撥給民地不

可輕動

九月甲子朔

上諭大學士等曰向令開海貿易謂於閩粵邊海民生有益且此二省民用充阜財貨流通則各省亦俱有益夫出海貿易本非貧民所能富商大賈懋遷有無薄徵其稅可充閩粵兵餉以免腹地省分轉輸協濟之勞腹地省分錢糧有餘小民又獲安養故令開海貿易今奉差郎中伊爾格圖奏請給與各關定例

款項於橋道渡口等處槩行徵稅何以異於
原無稅課之地反增設一關科斂乎此事恐
致擾害民生爾等傳諭九卿詹事科道集議
以聞

十月辛亥

上駐蹕桃源縣重興集視隄夫工作駐轡良久
親加慰勞復

諭河道總督靳輔曰隄工夫役風雨晝夜露宿
草棲勞苦倍常所領工食無幾恐有不肖官

吏從中侵蝕必使人沾實惠爾其加意軫恤

癸丑

上諭江南江西總督王新命曰朕巡視直隸山東江南惟高郵等地方百姓甚爲可憫今雖水涸民擇高阜棲息但廬舍田疇被淹未復生業朕心殊爲不忍爾係地方大臣應作何籌畫濬水通流拯此一方民命以副朕軫恤黎元至意

甲寅

御舟過高郵湖見民間田廬多在水中惻然念
之因登岸巡行隄畔十餘里召耆老詳
問致災之故

諭王新命曰朕此行原欲訪問民間疾苦凡有
地方利弊必設法興除使之各得其所昔堯
憂一夫之不獲况目覩此方被水情形豈可
不爲拯濟耶

庚申

上諭江蘇巡撫湯斌曰朕欲周知地方風俗小

民生計有事巡行凡需用之物皆自內府儲
備秋毫不取之民間恐地方有不肖官員借
端妄派以致擾害窮民爾其加意嚴察如有
此等卽指名題叅從重治罪其沿途供役緯
夫及聞朕巡行至此遠來聚觀百姓恐離家
已遙不能自歸爾逐一詳察多方區畫令其
還家

十一月丁卯

上諭吏部尚書伊桑阿工部尚書薩穆哈曰朕

巡幸東南省民疾苦路經高郵寶應等處見
民間田疇廬舍被水淹沒朕心甚爲軫念詢
問其故具悉梗槩高寶等處湖水下流原有
海口以年久沙淤遂至壅塞今將入海故道
濬治疏通可免水患自是往還每念及此不
忍於懷此一方生靈必圖拯濟安全咸使得
所始稱朕意爾等可往被水災州縣逐一詳
勘於旬日內覆奏務期濟民除患縱有經費
在所不惜爾等體朕至意速行

康熙二十四年乙丑四月戊戌順天府
府尹張吉午請自康熙二十四年始凡
民間開墾田畝永免圈取部議不允
上諭大學士等曰民間自開墾田畝若圈與旗
人恐致病民自後永不許圈如旗下有當撥
給者其以戶部見存餘田給之

五月丙戌工部議覆湖廣浙江採運楠
木不能如期特請寬限應不准行

上諭大學士等曰朕聞明時採運楠木從山至

河民力告竭地方苦累今運各省所備楠木杉木若程限太迫恐山路崎嶇轉運艱難地方雖有良吏不能不苦累百姓其令部臣詳議緩運勿致累民

戊子

上諭大學士等曰今歲雨暘時若二麥已登他穀亦皆沃茂秋成可望黎民不致阻饑但豪强富室田土旣多收穫亦豐往往用之釀酒又輕值收糴以待重價貧民田少收穫有限

更不節用效尤釀酒亦甚糜費雖遇豐年僅免饑饉倘遭荒歲何以自贍朕巡省閭閻歷歷親覩每一念及惻然疚懷應作何禁止使家給人足爾等可籌良策以待秋期舉行

九月甲申戶部題張家口諸處倉廩應令地方官設法修造

上曰若令地方官設法勢必加派於民可卽以本處稅銀修築

十月癸卯內閣以工部修治京城道塗

冊進呈

上曰工價支給尚少宜稍加增至修治小路若責之居民則貧人苦累矣其令如大路估算亦以錢糧給之

康熙二十五年丙寅二月壬子九卿等議覆四川松威道王隲條奏四川楠木採運艱難請行停減應不准行

上曰蜀中屢遭兵燹百姓窮苦已極朕甚憫之豈宜重困今塞外松木材大可用者甚多若

取充殿材卽數百年可支何必楠木著停止
川省採運

康熙二十六年丁卯十一月乙未

上諭大學士等曰近見支用修造等項奏銷錢糧時該部不准駁回者甚多此等奏銷屢行駁回官員未必捐橐補給亦止派取民間耳如此則百姓愈苦向因需用孔亟故奏銷者未卽准行今公帑竝非匱乏之時奏銷案件不必駁回卽應完結此等事不行駁回在官

員雖稍獲便利而於百姓乃大有裨益也

康熙二十七年戊辰七月甲午

上諭大學士等曰今武昌地方平定江寧京口
荊州諸路兵仍赴武昌則轉輸供應民力維
艱滿洲漢軍及調集綠旗兵皆令各歸本汛
又遇難官民之妻子恐以賊黨株累可令該
撫察明奏聞

康熙二十八年己巳二月乙卯

上巡幸浙江自杭州回鑾舟泊石門鎮

諭扈從部院諸大臣曰朕巡省民生風俗行次
浙江見省會兵民俱相和輯生齒蕃庶閭里
乂安但觀民間習尚好爲爭訟爭訟一興則
不肖有司因緣詐索勢所必至縱或官員無
所朘削而胥吏作奸究不能無私行勒取之
弊小民之牽連苦累者多矣夫微忿不捐搆
成嫌怨小則耗損物力大則傾隕身家其爲
蠹害不可勝言矜此愚民允宜深戒地方大
小衙門官員亦應各簡詞訟勸導閭閻俾守

分息爭共安生業又夙聞東南巨商大賈號稱輻輳今朕行歷吳越州郡察其市肆懋遷多係晉省之人而土著者蓋寡良由晉風多儉積累易饒南人習俗奢靡家無儲蓄目前經營僅供朝夕一遇水旱不登則民生將至坐困苟不變易陋俗何以致家給人足之風爾等可傳諭將軍總督等令家喻戶曉務使敦本興讓崇儉黜浮兵民日益協和風俗日益淳樸詞訟日益減少積儲日益豐盈則教

洽化行朕心實嘉賴焉

康熙二十九年庚午二月己卯

上諭江南江西總督傅拉塔曰蠲免錢糧原欲使小民物力稍舒漸登殷阜前已頒諭旨民間建立碑亭頌揚德意雖出羣黎愛戴之誠但恐致煩民力嗣後地方官員不得借端修葺碑亭以滋擾累

六月丙戌

上諭戶部朕撫育烝黎勤求民瘼務期休養漸

至阜安閭閻間有疾苦朕衷時切軫念近見
廣東高瓊等府地丁各項錢糧歷年逋欠如
係官役侵漁及豪強頑梗抗不輸納自應嚴
追倘因丁缺地荒不能輸納仍行徵比照例
考成則小民旣困追呼有司復罹叅罰徒滋
擾累終無裨益著該督撫以各州縣舊欠錢
糧不能辦納情由詳悉察明具奏

七月丙午

上駐蹕正紅旗鷹莊

諭大學士伊桑阿尚書顧八代等曰朕沿途閱
視見所踐田禾過於朕初時諭旨部中丈量
者惟鞍匠屯以南過此竝未丈量何地非朕
赤子可令侍郎賽弼漢卽自口以北至坡賴
村凡所踐田禾作速明晰丈量

康熙三十年辛未九月己巳

上諭戶部朕頃巡行邊外入喜峯口見民間田
畝多爲蝗蝻所傷又聞榛子鎮及豐潤縣等
處地方被蝗災者亦所在間有秋成失望則

民食維艱朕心深切軫念倘及時不爲區畫
儲蓄恐至來歲不免饑饉之虞著行該撫親
歷直隸被災各州縣通行察勘悉心籌畫應
作何積貯該撫詳議具奏其被災各地方明
歲錢糧若仍照例催科小民必致苦累著俟
該撫察報分數到日將康熙三十一年春夏
二季應徵錢糧緩至秋季徵收用稱朕體恤
民生休息愛養至意

康熙三十二年癸酉六月庚子

上諭大學士等曰朕每見各省往來及請安之人必問地方情形雨水霑足與否前問自江浙來者俱言今歲甚旱五月二十日尚未得雨朕幸江南深知彼處民生家無二日之儲所食之粟每日糴買若五月以後仍不得雨則米價騰貴貧民必至困苦此不可不預籌者著遣戶部才能司官二員一往江南一往浙江詳問督撫觀看雨水形勢來奏江浙地方雨水雖大若不沒禾穗水消禾卽復舊故

澇不足慮旱則所蓄之水盡涸真無計可施
朕又曾見舟中滿載猪毛雞毛問其故曰福
建稻田以山泉灌之泉水寒涼用此則禾苗
茂盛亦得早熟朕記此言將玉泉山泉水所
灌稻田亦照此法果早熟豐收江浙稻田俱
池中蓄水灌之池水不寒所以不用此也

八月丁酉戶部議覆漕運總督興永朝
疏言江北廬鳳淮揚等處漕糧請紅白
兼收應不准行

上曰米取圓淨各隨其地所出不論紅白令兼收勿勞百姓

十一月庚申

上諭大學士等曰今歲畿輔地方歉收米價騰貴通倉每月發米萬石此時價少減糶賣其糶時止許貧民零糶數斗富賈不得多糶轉販始於民生大有裨益又蒸造燒酒多費米穀今當米穀減少之時著戶部速移咨該撫將順永保河四府屬蒸造燒酒嚴行禁止

康熙三十三年甲戌二月癸酉直隸巡撫郭世隆等疏言臣遵

旨會同戶部員外郎雍泰查霸州文安等州縣及天津衛見在貯倉米穀共十萬餘石將此米賑濟霸州等州縣饑民需用三萬石所餘米穀應減價糶賣其景州等州縣將山東漕米截留平糶

上曰霸州等被水災地方所有積穀除散賑外餘著減價發糶其沿河一帶景州等各州縣

衛所著將山東漕米每處截畱二千石亦發糶以平米價著戶部行文該撫責成州縣實心奉行務俾小民均沾實惠朕不時遣人稽察如小民有不沾實惠將該管官一併從重治罪斷不寬宥

丁亥

上諭大學士等曰通州倉米平價發糶米價頓減於民大有裨益又沿河一帶州縣已截畱山東漕運糶與百姓誠恐不肖地方官員或

增價發糶或糶與販賣之人以致百姓不沾
實惠著巡撫郭世隆不時巡察

四月庚辰

上諭大學士等曰朕雖處深宮日以民生爲事
每巡視郊外必詳察農桑咨詢稼穡是以深
悉農家之事應於農事之先早爲籌畫方有
裨益朕以去歲雨水霑潦立春稍旱蝗種必
致爲災故諭直隸山東河南等處地方官傳
諭民間早耕田地将蝗種掩埋則後患可除

今已立夏或有餘蝗遺種漸漸長成致害田
稼亦未可知村莊愚民往往以蝗不可捕待
其自去此等愚昧之言尤宜禁止捕蝗弭災
全恃人力今差戶部司官一員宣諭直隸山
東巡撫令各州縣官員凡有蝗出卽親至其
地率民掩捕無使爲災再傳諭河南山西陝
西等處地方咸使知悉一體遵行

五月丁巳

上巡幸畿甸閱視河隄

諭內大臣等曰扈從衛士魚貫而行無得踐踏
民田著派侍衛等嚴查

九月甲申

上諭戶部朕惟黎元率育全恃農桑每遇歲時
豐穰比屋皆能自贍倘一經旱潦粒食無資
卽有俯仰不給之虞非相緩急而先事圖維
則補助之恩難以徧沛頃巡歷邊外道經密
雲等處地方見田畝歉收米穀價貴閭閻匱
乏衣食不充目前旣已艱難後歲何所依賴

宜豫爲籌畫用俾資生著遣部院堂官二員
會同直隸巡撫親詣年歲不登之各州縣詳
察明白應作何區處賑濟確議具奏其八旗
披甲當差及孤寡無依年老有疾中傷退閒
人等有實係貧窶窘於謀生者著各該都統
詳察姓名報部酌量恩恤爾部卽遵諭行

十一月癸酉吏部右侍郎安布祿工部
右侍郎常綬等奏臣等遵

旨查直隸安州等十一州縣貧民十萬餘口應

賑米四萬餘石

上諭大學士等曰朕思直隸米價騰貴小民艱苦若僅照數給發誠恐無益著將此米一半散給百姓一半照目前米價折銀給與貧民所餘之米著視時價酌減令民賤買如此則百姓既得銀兩而糴米又易庶小民均沾實惠其安州等十一州縣康熙三十四年地丁錢糧盡行蠲免又

諭曰密雲順義附近地方今年米穀未收除常

平倉所貯米穀照常糶賣外并將前轉運積
貯之米每月發千石平價糶之遣戶部賢能
司官各一員監視糶賣

大清聖祖合天弘運文武睿哲恭儉寬裕孝敬
誠信中和功德大成仁皇帝聖訓卷之二十一

大清聖祖合天弘運文武睿哲恭儉寬裕孝敬
誠信中和功德大成仁皇帝聖訓卷之二十二

恤民二

康熙三十四年乙亥正月戊寅

上諭大學士等曰興永朝奏請丈量湖南田地
有累於民否治國之道莫要於安民或有不
肖州縣官將田地竟不行丈量而輒稱餘田
加賦者亦未可定安有加增田賦而全不累
民之理著湖廣總督吳興琿詳察具奏

四月庚子戶部題天津開河工程行文
附近州縣派夫定限挑濬

上曰若行文各州縣定限派夫必至苦累民間
著停止行文卽發與僱價令天津等處僱民
挑濬如此則公事旣得告成而窮民亦可資
以度日矣

五月壬戌朔

上諭戶部尙書馬齊曰爾傳諭巡撫噶爾圖平
陽等處地震房舍倒塌人民壓斃伊應親身

於彼處設厰居住將被災百姓救護候朕諭
旨乃遽回省城殊屬不合除噶爾圖所奏外
有地震重處爾可詳察閱視加恩賑給本年
應徵錢糧停其徵收爾到彼處卽曉諭衆民
皇上爲爾百姓深切軫念特遣大臣賑救爾
衆民毋妄遷徙離散且恐因地震地方不良
之人及鎮標兵丁借端搶奪擾害生民傳諭
總兵官周復興親身率領官兵將此一帶地
方善爲防護其平陽府洪洞縣被災百姓爾

會同巡撫噶爾圖親身到彼處賑濟務令均沾實惠

六月癸卯

上諭大學士等曰時值久雨連綿乍止復雨將不利於田稼朕甚憫焉亟宜祈晴其傳禮部速議以聞

康熙三十五年丙子七月庚申

上諭戶部朕親征時聞宣化府牧養三旗駝馬所需草豆甚急皆先派龍門赤城蔚州百姓

供用後給價值恐小民不能如數支領著該撫委地方賢能官查明照價估給務令小民得沾實惠以副朕撫恤至意此地百姓供應軍需修治道途勞苦可憫俟冬間當免其來年之賦

九月丁丑

上諭大學士阿蘭泰等曰右衛兵丁馬匹若在大同一處喂養恐累小民著侍郎阿爾拜前去與監喂內大臣酌量於附近州縣分養務

給實價毋苦百姓

十二月辛亥

上諭大學士等曰去歲霸州等處州縣曾運通州之米與被災百姓減價平糶閭閻甚爲得濟今年水災更甚應如去歲運米於各州縣平糶可救直隸巡撫沈朝聘何州何縣當運米若干與民懋遷之其作速具摺奏聞勿緩俟開印時也

康熙三十六年丁丑二月乙未

上諭大學士伊桑阿曰修理道路專責之地方
官恐至太過可遣鄉導官法保布達修一車
可行之道足矣山西道路著按察使巴什道
員王輔鳩工督修令侍郎常綬前去按站備
辦草料柴薪渡黃河後陝西路濶無庸大修
或有宜畧修處著常綬等驗視令地方官修
之若修路太過勞及百姓責在法保布達與
地方官無涉也

戊戌

上諭右衛將軍宗室費揚固曰山西巡撫倭倫等頃給發右衛官員兵丁米豆草價值較時價減少以致窮兵苦累亦未可定又詢察大同府所屬州縣衛所之民運送右衛官兵馬匹所用草束殊爲苦累可將官兵之馬各畱一匹於右衛餘馬發附近州縣衛所酌派官員兵丁看守飼養小民可免運送之苦此後每草一束作何給價著議政大臣大學士在事官員會同爾等議奏

辛丑

上諭山西巡撫倭倫陝西巡撫党愛甘肅巡撫
郭洪等曰朕比年出師勦寇總期又安邊徼
永輯民生茲厄魯特噶爾丹勢蹙力窮畏死
悔罪遣使具奏乞降朕特親統六師再臨邊
塞相機勦撫因乘便巡覽邊境形勢察視軍
民生業遂發禁旅取道邊外朕自大同從內
地前赴寧夏一路地方見緣邊州縣地土瘠
薄軍民生計艱難朕心深切軫念一切御用

所需皆自內廷措辦不以煩民扈從簡少市
易之物悉依時值誠恐有強取抑價等事已
令都察院及科道官逐日稽察糾劾其經過
城堡衢市輒多結綵殊覺擾累嗣後著通行
禁止乘輿巡幸本爲安民豈可反勞民力爾
等務嚴飭有司不得借端科派仍張示曉諭
俾窮簷編戶咸悉朕曲體民依至意

閏三月甲午寧夏紳衿兵民人等聞

駕起行齊集

行宮前叩懇

皇上駐畱數日以慰羣情

上曰朕欲掃蕩寇氛以安黎庶特幸寧夏經理
軍務駐蹕十有餘日曩者南巡凡所巡幸之
處未有駐蹕至三日者且邊地磽瘠民生艱
苦朕甚憫之朕扈從人衆恐多畱一日卽滋
百姓一日之擾朕已定於十五日起行爾等
誠懇之意朕已知悉又向者曾欲使禁軍駐
防此地恐民間居處狹隘已命將房舍查明

給還本主爾等卽回故居可也

五月丙申

上諭大學士九卿等曰朕前巡幸直隸山東江南浙江見地方人民皆各安生業大小官員恐朕不時臨幸咸兢兢守法奉職以爲他省類皆如此頃由大同歷山西陝西邊境以至寧夏觀山陝民生甚是艱難交納錢糧其火耗有每兩加至二三錢不等者前曾面問總督吳赫據言西安等府距省甚近收耗尙輕

若沿邊所在地方火耗不免加重矣至於山西特一小省聞科派竟至百萬民何以堪科道官因朕已經訪問始行叅劾竝未有言於未發覺之前者亦屬何益

戊戌

上諭吏部等衙門朕頃以狡寇噶爾丹未滅調度軍務親莅塞外因念切民依巡歷邊境所至咨訪目擊山西陝西緣邊一路地皆沙磧難事耕耘人多穴居類鮮恒業其土壤磽瘠

固已生計維艱而地方遼遠疾苦無由上聞
大小官吏不能子愛小民更恣橫索遂使里
井日漸虛耗比年用兵以來一應軍需芻糗
俱動支正項錢糧儲侍供應從不取辦間閭
乃各府州縣官員借端私徵重收火耗督撫
布政使等官又不仰體朝廷恤民至意糾察
貪汙禁革加派反多瞻徇曲庇又或督撫庸
懦懈弛因而筆帖式及衙門人役無所忌憚
擅作姦弊以致民生滋蹙朕心深切軫惻今

外寇已經蕩平惟以綏乂地方拊循百姓爲
急務山陝兩省關係緊要應作何撫恤休養
著九卿詹事科道詳議以聞

六月戊寅山西巡撫倭倫疏請建

萬壽龍亭恭勒

聖諭

上諭大學士等曰何事建立龍亭若果善民自
感頌大同田薄民窮其建龍亭著停止倭倫
奏稱大同地方飼馬萬匹全不費民力自朕

觀之前大同養馬不過六千未始不用民力
朕因民勞苦故將康熙三十六年錢糧盡免
朕凡事俱務實行不尙過譽爾等可曉示之

康熙三十七年戊寅二月庚午

上諭大學士等曰山東巡撫李煒居官不善地
方饑饉百姓乏食竟不奏聞及至言官叅奏
始行具疏朕爲人君於國計民生日切存心
詳加審慮李煒身任巡撫不知撫恤百姓朕
又何賴焉著革職

五月甲申戶部議覆總督倉場侍郎德珠等疏言直隸朝鮮等處米貴將各省漕糧截畱一十五萬石賑濟請令有漕各省督撫於本年秋收時買補帶運還倉應如所請

上曰此截畱賑濟等項所費米石若令有漕省分採買帶運則小民運丁必致苦累京倉米石充裕所用之米無多採買補額著停止

康熙三十八年己卯九月戊申

上諭大學士等曰各省採買物件科派累民不
若折色解京官買總之累民之事雖纖毫亦
不可行向日口外蒙古困窮人不聊生朕近
年來任人經理多方撫育培植之今已家給
人足樂業安生可見治民之道全在休養也

康熙三十九年庚辰二月乙酉湖廣總
督郭琇奏稱

皇上命臣選奏丈量地畝官員但湖南民稀地
廣恐清丈後錢糧較前減十分之二

上曰果於民有益所減雖倍於此亦有何害若
不清丈以荒田著落他人徵收錢糧有累羣
黎斷不可也此事綦重保題丈量官員爾具
疏來照所請行

三月甲午朔

上諭大學士等曰修築永定河夫役雲集人多
則需米穀價必致騰貴遣戶部賢能司官二
員截山東河南漕米二萬石畱於信安柳岔
二處會同地方官照前稍減時價平糶至附

近信安修河諸處屯莊米石亦令糶賣有益
於民令內務府總管查明具奏

康熙四十一年壬午閏六月癸未戶部
議覆山西巡撫噶禮疏言右衛駐防官
兵浮給康熙三十六年分草束折色銀
兩請交各旗追還

上曰此浮給官兵草束折色銀兩復行追賠殊
爲可憫若向誤給官吏追補必致派累小民
其免之

康熙四十二年癸未正月壬申

上巡閱南河駐蹕長清縣界首舖

諭大學士等曰昨夜大風南村失火朕遣大臣
侍衛撲滅之小民遭此深爲可憫著傳諭巡
撫布政使察明被災房數并議作何行賞之
處大學士等遵

旨令巡撫王國昌等察明并議每房一間償銀
三兩

上曰專委地方官行賞小民未必盡沾實惠著

交近御侍衛海青等監視散給

二月丙子朔

上諭山東巡撫王國昌曰朕自泰安州見新泰
蒙陰沂州郯城等處城郭鄉村黎民被災甚
苦雖蠲免正賦兼行賑濟猶恐未能大有裨
益如以養蒙古之例施於山左庶青黃不接
之際小民得以度日命在京滿漢大學士九
卿會議無論官民有情願効力者作速遣往
山東不拘銀米同地方官分界賑濟以及降

級革職人等有情願贖罪者亦准其贖罪俟
秋成之後視其果有裨益酌量議敘至該撫
尤宜董率屬員善爲撫綏勿致流離務期副
朕視民如子之至意卽將告示刊刻遍行曉
諭

八月甲申刑部尙書王士正等因山左
被災奉

旨截畱漕米并派八旗官員領帑往賑具疏奏

謝

上曰朕四次經歷山東於民間生計無不深知
東省與他省不同田野小民俱係與有身家
之人耕種豐年則有身家之人所得者多而
窮民所得之分甚少一遇凶年自身竝無田
地產業少壯者流離於四方老弱者卽死於
溝壑此等情由爾省大臣庶僚及有身家者
亦當深加體念似此荒年雖不能大爲拯濟
若輕其田租等項各贍養其佃戶不但深有
益於窮民爾等田地日後亦不致荒蕪如果

民受實惠豈不勝謝恩千百倍耶

十月庚寅理藩院議覆扎薩克大喇嘛
綽朱兒喇穆扎木巴奏將伊所原居洮
州衛卓柰克依特之廟伏懇開廣修造
應如所請

上曰取邊氓之地以廣修廟宇關係民生嗣後
凡有廣廟宇與民間田廬有關者永行禁止
康熙四十三年甲申三月辛酉

上諭大學士等曰朕因山東及直隸河閒府等

處饑民流至京城者甚多特命八旗諸王貝勒大臣總管內務府各官及漢大臣官員於數十處立粥廠日煮粥賑濟務使流移之人得所酌量賑給數月但此等饑民棄其家業聚集京城以餬其口實非長策應作何料理始復舊籍得安生計爾等會同九卿詹事科道等確議具奏

康熙四十四年乙酉三月己亥

上諭山東巡撫趙世顯曰朕爲兩河告成特來

巡閱道經山左見民生自去歲休養之後漸有起色朕心甚慰夾岸黃童白叟懽呼載道感恩叩謝者日有數十萬今仲春之時麥苗未長未致妨農至回鑾之際正值農忙麥秀恐妨稼穡爾卽曉諭百姓概免叩謝各務農事可也

癸丑

上諭兵部侍郎貝和諾江寧將軍鄂羅舜等曰自江寧至蘇州坐臺兵丁可令撤去各回本

汎今當麥秀之時倘軼路而行恐致踐傷隴
麥且御舟所泊亦時與坐臺處相左隨駕人
員自足環衛爾等轄下兵丁固當在此効力
朕非謂其勞苦而遣歸也但係農時不比冬
令耳其兩岸護送綠旗兵鎮江坐臺兵丁一
併撤去

壬戌

上諭江南江西總督阿山江蘇巡撫宋犖曰朕
爲兩河告成楊家莊新河建閘特來閱視爾

等復偕地方官民再四懇請故渡江而南見
百姓雖不能比戶豐饒幸安居樂業無憔悴
之色朕心少慰編氓皆朕赤子休養生息已
數十年民雖至愚亦所深悉故扶老攜幼日
計數萬隨船擁道歡聲騰沸此皆由中而發
非假飾也但人多路隘菜蔬苗麥瀰漫田野
不無踐傷朕甚惜焉爾等卽出示曉諭萬勿
踏壞田禾有負朕恤民之意

康熙四十六年丁亥七月戊寅

上諭大學士等曰浙江巡撫王然江南江西總督邵穆布奏報旱災以此揆之被旱之處甚廣朕屢幸南省其地方山川形勢及小民生業鮮有不知者南方溝洫最多水之出入固易然亦只可備平常小旱而已若至大旱河蕩盡涸惟近大河之處猶可薄收若田高河遠之處水不能到必至全荒且小民有田者少佃戶居多豐年則納糧之外與佃戶量其所入分之一遇歲歉則佃戶竟無策可施矣

南方卑濕民間難以蓋藏故比戶而居有米者少凡飲食諸物每日見買此數年幸遇豐稔可以無虞今遇大旱所關匪細奏聞之後若能得雨不必言矣如未有雨不早加詳議殊非朕保民如赤子之心矣著九卿詹事科道會同速議具奏

十一月己未

上諭大學士等曰福建內地之民居住臺灣者甚多比來洊罹災祲米穀不登若土著之人

猶可採捕爲生內地之民在彼者糧食缺少
難以自存欲歸故土則又隔大洋誠爲可憫
著行文該地方官察明情願復歸本地者或
遇兵丁換班之船或遇公務奉差之船令其
附載帶回原籍

康熙四十八年己丑七月乙亥

上諭大學士等曰湖廣江西稻穀豐收沿江之
米甚多而近日江浙米價愈貴朕爲民生計
時切憂勞輾轉思之上江之米不禁其沿江

而下者特欲使江浙米價平耳今富豪之家
廣收湖廣江西之米囤積待價於中取利雖
米船沿江而下而糶賣之米愈少此事關係
貧民甚大爾大學士及九卿諸臣皆國家倚
賴之人所以爲民生憂慮者必與朕同當何
如有濟於民著公同詳議速奏

己卯大學士九卿等遵

旨議覆湖廣江西產米甚多但恐富商囤積圖

利應嚴查禁止

上諭大學士等曰朕因湖廣江西之米商販由江而下者多而江浙米價不減故命爾等會議若將囤積米石定例禁止則借此橫查不過利於胥役而已百姓不但無益反致受害矣爾等但言其枝葉未究其本源朕意以爲必於本源之地清查自無收買囤積之弊湖廣江西之米或江浙客商或土著人民某人於某處買米若干清查甚易應行文湖廣江西督撫委賢能官將有名馬頭大鎮店買賣

人名姓及米數一併查明每月終一次奏聞
并將奏聞之數卽移知江浙督撫湖廣江西
之米不往售於江浙更將何往此米衆所共
知則買與賣不待申令而米之至者多卽大
有利於民也

康熙五十二年癸巳二月丁丑
上諭吏部尙書兼管倉場事務富寧安等曰朕
聞京城近日米價較往年稍貴想因直隸各
省人民今歲來京甚衆之故應發倉米一萬

石照時價減糶則米價可平於民生大有裨益若一萬石不敷卽再發一萬石平糶

四月辛亥

上命都察院左都御史趙申喬往廣東平糶倉穀

諭之曰朕覽廣東奏銷冊內見存米二萬餘石以之減價平糶似屬有益爾至廣東詳查如所糶穀石尙不足用卽速奏聞朕令動正項錢糧買米平糶江西湖廣二省不禁商人販

米良有益處前江浙米貴朕諭將湖廣江西
米船放下江浙米價遂平廣東督撫若於正
月間早行奏聞則海運可及今風信不順海
運尙難行也

五月庚辰

上諭大學士等曰提督康泰奏稱蜀省一碗水
地方聚集萬餘人開礦隨逐隨聚見在差官
力行驅逐朕念此等偷開礦廠者皆係無室
可居無田可耕之貧民每日得錙銖爲養生

之計若盡行禁止則伊等何以爲生果如滇省礦廠所出頗多亦可資助兵餉此處所出無多應令該地方文武官員盡心設法使窮民獲有微利養贍生命但不得聚衆生事妄行不法耳

六月己丑

上駐蹕熱河行宮

諭大學士等曰從來壬辰癸巳年分雨水應多去歲幸而未澇觀此兩日雨勢連綿此處山

水或發亦未可定東邊之隄因城牆所逼水必洶湧東邊巡守之人在河灘中者若不小心則無走避處矣應預爲之備至於貿易人民所居之屋凡當澗口之處亦各應防備若山水夜發當水處恐致被衝將此曉諭

辛卯

上諭大學士等曰連日之雨朕甚恐致澇今晴甚佳人居高處尙無妨但田禾可惜耳昔人謂壬辰癸巳年澇去歲獲免尙今歲五月初

十閒雨至此時可柰何朕記

太祖皇帝時壬辰年澇大饑另戶人家以致賣身

世祖皇帝癸巳年霪雨大澇京城內房屋牆垣傾頽不堪明成化時癸巳年澇城內水滿民皆避居於長安門等處後水至長安門復移居端門前至棋盤街今歲朕未來時雨水甚大老人有言後澇不及前澇但霪雨不止則田禾倒青矣朕甚慮之

九月辛未戶部等衙門題廣東廣西總督趙弘燦浙江福建總督范時崇等言將江南浙江米石運至廣閩備用於地方民生大有裨益應將江南省捐納米十萬石令總兵官穆廷棻總管船隻運至閩省廣東督撫撥船至閩省接運往廣東浙江亦報被災將五萬石仍畱浙省將五萬石令總兵官吳陞運至閩省上曰浙省今歲歉收十萬米石仍畱備用江南

十萬石內將五萬石運至福建五萬石運至廣東米到日卽行平糶勿致浥爛

十月庚寅

上問戶部尙書張鵬翮曰錢糧之數若何張鵬翮奏曰此數年因

皇上所免錢糧甚多今見動用至四十九年錢糧

上曰卽動至五十年錢糧亦無妨爾等爲戶部故如此奏耳朕心惟百姓爲重今廣東福建

沿海之府州縣等處正青黃不接之時尙宜酌量免其錢糧張鵬翮奏曰頃

皇上特加殊恩已令運米賑濟矣

上曰米雖運去但足餬口耳不能辦錢糧也張

鵬翮奏曰至彼時再行請

旨

上曰不可遲延今卽其時矣

康熙五十三年甲午三月乙巳

上諭戶部甘肅一帶地方去年春麥失收秋田

亦歉經該督撫奏報甚明其地俱係山田稍
遇天旱易致荒歉是以舊歲特沛恩澤蠲免
租賦見在雖據該督撫設法賑濟給與牛種
此外更應作何籌畫使小民得所永有裨益
著遣工部右侍郎常泰大理寺少卿陳汝咸
到彼會同該督撫詳查地方百姓情形確議
具奏

癸丑

上以甘肅被災

命工部右侍郎常泰大理寺少卿陳汝咸前往
察勘

諭之曰朕曾至寧夏其地方有似蒙古所種惟
青稞遇歲不收民卽流散爾等到彼應與總
督鄂海巡撫岳拜計議教百姓牧養牛羊蓋
甘肅地方不比直隸山東與蒙古同宜畜牛
羊雖遇荒歲食乳亦可度日矣又其地產肉
菰蓉天門冬煮食之味似山藥又一種沙米
亦可食被災諸處爾等悉親身往勘會同督

撫酌議以聞

六月丙戌

上諭領侍衛內大臣等曰天氣甚熱貿易人等多夜行者伊等但知爲利不顧其身朕甚念之嗣後有緊要事方許夜行朕視商民皆如赤子無論事之鉅細俱當代爲熟籌也至於一應隨行官員兵丁執事人等如有公事不必過亟緩緩前行將此交與兵部自喀喇和屯以至口上俱遍張告示併於各該管處通

行曉諭

十月壬辰甘肅巡撫綽奇疏言甘肅寧夏等處今歲被災窮民請計口散賑至來年夏收時停止

上諭曰甘肅地方被災流移各處就食之民見令招回本處但時尙沍寒本處竝無糧米招回無益俟來年春耕時送回方有益也

康熙五十五年丙申閏三月壬午

上諭大學士等曰直隸巡撫趙弘燮因順天永

平兩府所屬地方米價騰貴民多乏食奏請
借帑銀差官貴買賤賣再借莊頭積貯之米
減價糶賣朕思治天下之道以養民爲本當
此太平之際而使民乏食可乎從前如福建
廣東遠處偶遇災荒猶海運賑濟况京師畿
輔之地乎去年順天永平保定河閒宣化五
府因雨水過多米穀歉收已將錢糧盡行蠲
免積貯之米減價糶賣見今閭閻積貯無多
若又以銀買穀則米價益加騰貴今京倉通

倉之米甚多將倉內所貯之陳米發二十萬石遣堂司官運至各處地方不論旗民確查賑濟窮民始得均沾實惠且直隸北四府地方有水路可通卽由旱路運去亦不甚遠不過在人區畫而已至於運米腳價以米給之亦可煮粥之柴以米易之亦可近京之地減價糶賣今又發陳賑濟則小民斷無乏食之虞矣又

諭曰朕聞今年直隸南四府地方麥苗甚好但

麥收時亦止有地之人得食而已未種麥之人何由而得朕意此番賑濟須至九月民方不致乏食每歲五城煮粥施濟至三月卽止今尙未停止於民大有裨益古之人君居深宮之中不知民間疾苦者甚多朕巡行各處曾目擊之故知之甚確又於直隸各省年穀豐歉時加訪問地方大吏所以不敢隱瞞朕凡事但求實濟不務虛名卽如積貯之事聞之似善行之甚難從前連歲豐收朕曾諭地

方官令民間節省積貯但窮民一年所得餬口之外別有費用何得餘剩至於社倉一事李光地任直隸巡撫時曾以此爲有益卒不能行今太平已久生齒日繁而田土未增且士商僧道等不耕而食者甚多或有言開墾者不知內地實無閒地今在口外種地度日者甚多朕意養民之道亦在相地區處而已陝西臨洮鞏昌等地方雖不可耕種若於有水草之地效蒙古牧養則民儘可度日而百

姓但狃於種地不能行此昔年去山東賑濟人員曾云或有人在牛旁不知取乳而食坐以待斃此皆不習之故耳爾等將趙弘燮所奏之事會同九卿確議具奏

五月壬戌

上諭大學士等曰京畿地方至今雨未霑足朕心不勝焦勞自密雲至口外田禾甚佳及問各處來人俱云雨水尙有不足之處念京城人民輻輳就食者多且太平日久人口滋生

多至數倍以此平素閒諄諄以此事面諭諸大臣今值暵旱之際若再不亟爲籌畫朝廷之上所理者何事乎閱此次報內米價又長八旗官兵糧米定例於八月內支放今若候至八月米價必愈加騰貴著於五月初十日起卽行支放至京城米石若仍行減糶甚爲有益著再發米三萬石交與原派賣米官員減價糶賣爾等轉諭戶部

康熙五十六年丁酉六月丙戌

上諭大學士等曰今年雖旱然得雨之後或連綿陰雨亦未可定應傳八旗軍民人等將危圯房屋牆垣修理滲漏之處早行苫蓋并潮濕朽壞物件移置高處凡事豫則易備朕凡經歷之處心思所到卽行傳諭卽不連綿陰雨平常豫備亦可也

十月癸卯

上諭大學士等曰朕理事五十餘年無時不以民生爲念凡巡行所至之地卽加訪問故於

民之疾苦無有不知各省奏事之人伊所過
地方年景豐歉米價貴賤無不詳悉問之故
總督巡撫提督總兵官等一切事皆無敢隱
匿者今年各處皆豐收河南連年大熟朕念
切民生爾諸臣當體朕恤民之意凡有聞見
之處卽當奏聞不可佯爲不知也

康熙五十七年戊戌八月庚子

上諭大學士等曰聞今年安徽所屬地方出蛟
發水甚是傷民前日曹頌家人來奏晴雨錄

詢問是實總督巡撫雖未啟奏朕既聞知心
切軫恤京中有安徽地方官員著九卿速行
問明

康熙六十年辛丑四月己酉

上諭大學士等曰去冬雪大所以今春雨澤甚
少大約冬雪多則春雨必少春雨少則秋霖
必多此非有占驗而得知者也朕六十年來
畱心農事較量雨暘往往不爽且南方得雪
有益於田土北方雖有大雪被風飄散於田

土無益今歲山東得雨河南山西陝西未甚
得雨備荒最爲緊要不可不預爲籌畫若直
隸山東河南已難料理至山西陝西其補救
尤難古人云三年耕則有一年之積九年耕
則有三年之積言雖可聽行之不易如設立
社倉原屬良法但從前李光地張伯行曾經
舉行終無成效至於各省積貯穀石雖俱報
稱數千百萬實在存倉者無幾卽出陳易新
之法亦不爲不善第春閒僅有所出秋閒竝

無所入州縣官侵蝕入己急則卽以折銀掩飾此等積弊朕知之甚詳其報荒之真僞虛實朕亦無不洞悉如熱河所積穀石每年減價平糶秋收糴補還倉數目無多稽查頗易所以每有餘糧語云大兵之後必有凶年昔征勦三逆時豐收足以供給竝無一州一縣貽悞及平定以後間有歉收之年不可不綢繆於未雨也邇來稍覺曠旱或者政事有缺失應行改正之處亦未可定爾等會同詳議

具奏

五月甲申

上諭戶部朕御極六十年自冲齡時惟以黎庶
爲重宵旰圖維勤勞至今今春朕之子孫暨
六世孫輩與舉國官兵人民請行大慶典禮
在朕固所應受衆亦咸以爲宜朕意昔年辛
丑係

皇考賓天之歲今歲又值辛丑况西陲用兵事
尙未竣是以堅辭不受今年朕躬自四月違

和五月初旬又復感寒遂覺甚病以致面色
稍減或稍行動或多言語便不勝倦乏目今
直隸山東河南山西陝西麥已無收民多饑
餒屢令大學士九卿議奏茫無頭緒似此尙
忍而不言將來不知作何底止也諸大臣皆
受高爵厚祿應視萬民如一身一家各抒拯
救之法若必俟朕降諭旨推諉於朕則大臣
所任何事耶今朕躬甚弱心思亦短易倦善
忘惟諸大臣是賴救民之策不可不急爲籌

畫著大學士九卿等速行詳議甚勿輕視倘再遲時日被災之民不能待矣

九月辛亥

上諭近御侍衛等曰爾等日侍朕側於朕心憂勞之處差知大槩若百官萬民何從而知朕日理萬幾其他姑置勿論卽每年春時爲雨水田禾時刻不忘畱心究問直至秋成始稍釋念至於冬日內地常恐雪少口外地方又恐雪大此等苦心惟身歷方能知之卽爾等

日侍左右者亦未必悉知也

康熙六十一年壬寅二月乙酉

上諭吏部侍郎張廷玉內閣學士勵廷儀曰去歲秋冬雨雪頗少今春已屆清明尚覺亢旱民以食爲天朕以萬姓爲念雨暘不時朕心豈能安乎見今各處爲朕祈福不如祈雨倘得大沛甘霖朕卽以爲福矣

六月壬戌

上諭大學士等曰盛京地方屢歲豐收米穀價

值甚賤民間或致濫費著令盛京米糧不必
禁糶聽其由海運販賣可傳諭盛京將軍府
尹知之

大清聖祖合天弘運文武睿哲恭儉寬裕孝敬
誠信中和功德大成仁皇帝聖訓卷之二十二



